

Sra. Monique Giel- Labat a relata:

Un mucha muher cu no a paga tino den carnaval a sali na estado di un adicto ambulante



ORANJESTAD (AAN) – Den conferencia di prensa yama pa e integrantenan di e team “Paga Tino”, señora Monique Giel- Labad di Wit Gele Kruis a hiba palabra. El a menciona cu ta hopi

importante pa WGK forma parti di Paga Tino, pasobra e ta e instancia cu ta registra no solamente e cantidad di embarazonan hubenil, di Aruba completo, pero nan ta analiza e aspecto aki.

Sra. Giel- Labad a duna di

conoce cu durante e ultimo dos añanan WGK a observa y analiza tur e problemanan cu ta bin dilanti pa e hobennan, specialmente durante e periodo di carnaval, y esaki ta e consumo di alcohol y droga.

Bao influencia di esakinan nan tin relacion sexual irresponsable, cu consecuencia di embarazo indesea.

El a menciona cu nan ta enfoca mas riba e periodo di October cu November, cu ta esun unda mas baby ta nace cual cantidad ta keda halto.

Aunke nan no ta wak específicamente e cantidad sino kico ta e motibo cu e mucha muher ta sali na estado y esaki ta consumo di alcohol y droga, y vooral uso di alcohol.

Nan ta enfoca hopi riba e aspecto aki, pasobra ora un mucha muher ta sali na estado bao influencia di alcohol, e no sa ken ta e tata di e baby, of nan ta haya un malesa transmiti sexualmente.

Sra. Giel- Labad a reitera cu

riba e aspecto aki e kier enfoca mas tanto den e epoca di carnaval, pa e hubentud bira mas conciente. No pa bisa nan pa no bebe pasobra nan ta hacie tog, pero pa nan keda na tino, ya cu ora nan bebe y nan no ta na tino tin cosnan ta sosode, manera un caso cu un hobencita a sali na estado di un adicto ambulante.

E kier haci enfasis cu esaki ta sosode den bida real aki na Aruba. Pesey su mensahe den nomber di Wit Gele Kruis y

hunto cu FADA cu cual e ta traha den e proyecto di Paga Tino ta: “Durante carnaval, hobennan, pone hopi atencion y bon tino riba kico bo ta haci durante carnaval, pasobra despues e ta lamenta”. Aña 2013 a cera cu un cantidad di 142 embarazo y compara cu 2012 a baha cu un so, esaki kiermen cu e cantidad ta keda halto pero no solamente esey sino e problemanan cu e ta bin cune, despues cu e hoben ta haya yiu.